

1 Simme Saane Tour 13.+14.6.2009

1.1 Teilnehmer

Vale, Sarah, Oli, Tobi, Rahel, Felix, Mirjam, ich (Putze)

1.2 Heldentaten

De Grund wieso ich de Brecht scribe esch ned de öblech. Ich ben eistemmig dezue bestimmt worde und chan gar nüt deför.

Am Samschtig Morge ben ich vom Felix und de Mirjam abholt worde. Nochere gmüetleche Autofahrt es Simmetal händ mer die Andere am Ussteg troffe. Noch dem en schachtle Chriesi vernechtet worde esch, und mer eus e eusi Lieblingsbechleidig zwängt händ send mer mol zum Ihsteg gfahre.

Wo esch de Helm?? Und drom macht sech d'Sarah nomol uf de Wäg zom Ussteg. De Rescht verchörtzt sech d'Pause metemene usgebige Zwipf.

Nochere halbe Ewigkeit send mer endlech uf de Simme met sehr wenig Wasser gsi, ich met de Hoffnig dass ich das mol mis Material ganz bes an Ussteg bringe (ich han bes jetzt jedes mol öppis kaputt gmacht uf dem Bach).

Noch em spele em wohl beste Cherwasser vode Wält undere isi-getschillte Fahrt send mer und mis Material heil am Ussteg ahcho.

Nochem Glacéesse em Hirsche send de Felix und d'Mirjam weder hei gfahre. Mer andere händ eus uf de wäg nach Château-d'Oex gmacht. Wäred em Moschttrenke und gmüetlech plaudere hät sech uf em Zältplatz en merkwürdige Duft noch Benzin, heissem Öl und Abgas breit gmacht. Nebe eus händ sech es paar Franzose wo met erne Citroën Traction-Avant unterwägs gsi send ihgrechtet. Mer häts gfühl gha als öb sechs die Französisch Mafia us de 50er Jahr breit macht. Ich ben glaub de einzig gsi wo sech vo dene Fahrzüg begeistere loh hät, komisch.

Do jo bekanntlech paddle und die Düft vo ungfelterete Abgas hungrig mached händ mer s'Znacht vorbereitet. D'Sarah hät Gussalat gmacht und ich han Champignons gföllt. Als d'Gluet zum Brötle langsam guet gsi esch, taucht wie bstellt de Vale uf. Uf em Grill häts Würst und 1-2 Spearrips pro Person geh. Vollfrässe send mer denn go schlofe.

Am Sonntag, noch em Zmorge esch de Oli no zo eus gstosse. Au d'Saane hät ned meh Wasser als d'Simme gha. So send mer gmüetlech dor die drü Schluchte und no gmüetlecher dor d'Zwöschestück gfahre. Nochem Zwipf am See händ mer eus uf de Heiwäg gmacht.